



香祖草記

元

15
104
1





# 香祖筆記

說部叢書昉於漢魏盛於唐宋以來

失識大識

皆載文武之道雖聖人猶學之士君子著書立說  
豈苟然哉大抵人品高師法古興會佳兼是三者  
其立言必雅馴足以信今而傳後他若稗史野乘  
摭拾浮誕不經之言用以誇示三家村農及五都  
市兒已耳大雅捧腹吾無取焉阮亭王先生今世  
之古人也與余交素心莫逆垂四十年自其同官  
長安日公退之暇輒見其著書自娛殆無虛日聲  
詩古文而外間隨筆為劄記要必貫弗經史表章  
文獻即一名一物異日可垂典故備法戒者乃錄

曾5  
104  
卷1



之否則略而弗書比年有池北偶談居易錄皇華  
紀聞諸書次第行世近又輯癸未迄甲申兩年筆  
記屬校訂爲序余受而卒業或辨駁議論得失或  
闡發名物源流或直書時事或旁及怪異率皆精  
簡而不浮如噉蜜者中邊皆甜歎有餘味又如捉  
松枝塵作魏晉清言吐納風流雖起玉何諸子於  
今日無以相難也洵可謂閱覽博物君子矣在余  
閱益都孫文定公顏山雜記服其簡核次則德州  
田少司寇黔記亦有思致二公與阮亭皆齊產然  
平心品題終當讓此尤勝筆記十二卷香禊乃其

軒名義取室有叢蘭也空谷不言無人自芳政可  
想見其人品耳若夫師法古興會佳直阮亭之緒  
餘也夫康熙乙酉春日西陂同學宋犖撰



論曰夫取淵之西春日西郊同學宋榮時  
其具甚多而皆不記雖人自其如何  
神必其難定自其難定

香祖筆記自序

愚舊有池北偶談二十六卷刻于閩居易錄三十  
四卷刻于粵皆有成書壬午後盡急還京師偶有  
見聞筆之簡策適所居邸西軒有蘭數本花時香  
甚幽淡昔人謂蘭曰香祖因以名之凡十二卷漁  
洋山人王士禛







右春坊右諭德兼修撰沈涵進講四書親親而仁  
民二句少詹事賽音布翰林院修撰胡任輿進講  
書經惟德惟義時乃大訓二句講畢 賜茶文華

殿門

江南道監察御史張瑗題為逆惡之罪既已正典  
于前朝私豎之碑豈宜傳流于後世亟請乾綱剝  
毀以儆奸邪以垂鑒戒事恭聞我 皇上前歲翠  
華南幸命修岳飛之墓賜題于謙之碑誠以此二  
臣者忠貫日月義壯山河故特表而揚之以風示  
天下夫善在必彰者則惡在所必瘳臣奉命巡視

西城前往西山一帶查閱至香山碧雲寺寺後峻  
宇繚牆覆壓數里鬱蔥綿亘金碧輝煌疑是前代  
王侯寢宮詢之土人乃知為故明罪惡滔天磔尸  
身後逆璫魏忠賢之墓墓上有穹碑二屹然竝立  
合書欽差總督東廠官旗辦事掌惜薪司內府供  
用庫尚膳監印務司禮監秉筆總督南海子提督  
保和等殿完吾魏公忠賢之墓臣觀覽之下不禁  
髮指夫魏忠賢者在故明天啓時竊操國柄屠毒  
忠良惡貫滿盈一時羣小皆出其門德碑生祠幾  
徧天下神人共憤道路以目至崇禎初年罪狀發



露押往祖陵潛行自盡磔尸河間迄今公論在人  
尚恨戮尸不足以蔽厥辜乃畿輔近地尚留此穢  
惡之蹟僭越之制何以儆巨憝昭大法哉况當奉  
旨纂修明史之時凡明季忠良被禍諸臣無不  
立傳表揚以彰公道光天化日之下豈容奸孽餘  
黨膽大潑天目無三尺仰祈天威乾斷勅地  
方有司立仆其碑刻平其墓俾天下後世知凶惡  
之徒不能遁憲典于身前并不能保墳墓于身後  
其于聖明瘴惡之義不啻炳如日星嚴如斧鉞  
矣云云奉旨魏忠賢碑墓著交與該城官員仆

毀刻平該部知道瑗賦詩紀事云彰瘴表天道誅  
賞昭王綱伊誰實職之蘭臺凜秋霜道惟鉏姦宄  
庶以全善良攬轡出都門陟睇西山岡廬舍匝阡  
陌各各營農桑厥俗一以樸民氣尤悅康榛莽化  
蘭蕙無復嗥豺狼尋憇古佛剎紺碧何輝煌背負  
諸墓碣封樹皆貂璫逆閹塚踰制陵園相頡頏穹  
碑轟霄漢長松繞垣墻以彼稔凶惡萬死奚足償  
搏噬縱鷹犬湯鑊烹鸞鳳天地盡暝晦白日無晶  
光古多寺人禍茲禍踰漢唐國步倏艱脆社稷旋  
淪亾彼身已寸磔墓胡留山陽我見髮上指衝冠



心激昂及此不鏟薙無乃忤蒼蒼拜疏請 明旨  
聖德奮乾綱碑仆墓亦毀狐兔將安藏堯舜除  
四凶海宇稱平章誅惡及勝國來者心自臧岩壑  
滌穢濁草木回芬芳聊以佐史筆憲紀于焉張瑗  
字蘧若祁門人予辛未科南宮所取會元也以編  
修改御史一時賦詩紀事者甚衆 按工部郎中  
萬公燝疏云臣於三月詣陵開工過香山碧雲寺  
見魏忠賢所營墳墓碑石崢嶸隧道深闊翁仲簪  
朝冠而環列羊虎接駝馬以森羅制作規模髣髴  
陵寢云云則闔擅國柄時自營生壙已久特既誅

之後未有建議毀之者故倖存至今耳  
羽紗羽緞出海外荷蘭暹羅諸國康熙初入貢述  
一二疋今閩廣多有之蓋緝百鳥毳毛織成予按  
異物彙苑唐安樂公主使尚方合百鳥毛織為裙  
正視旁視各為一色日中影中各為一色而百鳥  
之形狀皆見然則古亦有之矣又南史齊文惠太  
子織孔雀毛為裘華貴無比武后有集翠裘以賜  
倖臣皆其類也又滿刺加哈烈出鎖袂一名梭服  
鳥毳為之紋如紈綺今閩中最多價不甚高非羽  
紗羽緞比



浙江巡撫某疏明紹興府知府湯紹恩於三江海口築塘建閘旱澇無害逮我朝定鼎洩水驅沙靈異尤著禦災捍患利益弘多伏祈勅賜褒封祀典云云下禮部議允行

京師粥花者以豐臺芍藥為最南中所產惟梅桂建蘭茉莉梔子之屬近日亦有佛桑榕樹榕在閩廣其大有蔭一畝者今乃小株僅供盆盎之玩佛桑重臺者永昌名花上花見魏林伐山

鄞處士萬斯同字季野與其兄斯大字充宗同游黃太冲之門充宗研精經學而季野貫穿史事于

明代三百年典故如指諸掌史館總裁諸公聘入

京師一切皆取衷焉初先伯祖太師公諱象列傳汪

編修琬倪檢討粲各有撰述季野從實錄搜采十

許事補入視二君為詳其所撰宋季忠義錄十二

卷一卷載恭帝端宗末帝本紀陳仲微二王始末

二卷迄末自江萬里文天祥而下逮劉辰翁凡四

百六人皆向來紀載所未備也所著又有南宋六

陵遺事一卷庚申君遺事一卷補歷代史表六十

卷歷代宰輔彙考八卷廟制圖考四卷河渠考十

二卷崑崙河源考二卷儒林宗派八卷羣書疑辯



十二卷書學彙編二十四卷可謂通儒壬午四月  
歿于京邸甚可惜也

自己卯順天鄉闈 乾清門覆試舉人後直省考

試官自侍郎以下槩行開列恭候 欽點壬午鄉

試以副都御史張睿主考陝西御史吳甫生副之

吏部 選郎中陳汝弼主考江南工科給事中黃

鼎楫副之御史劉子章主考江西御史傅作楫主

考浙江翰林滿洲阿爾賽副之湖廣巴海

大理評事  
子門人

山東滿保河南傅森皆翰林滿洲人山西孫致彌

戊辰庶吉士副都御史御史庶吉士典鄉試自是

科始

二十年來京師士大夫不復用金扇初則尚金陵

仰氏伊氏素紙扇繼又尚青陽扇武林各色夾紗

扇未幾廢而不行獨尚曹氏靴扇溧陽歌扇一時

風會雖小物亦然殆不可曉也

壬午七月浙江巡撫趙申喬疏言浙省每科試卷

一萬二千有奇舊例同考官僅十三人不能徧閱

請增三員禮部覆允併通行各直省如有試卷數

多房考不足者題明量行增加得 俞旨是科浙

闈解額視江南之數并著為例



香林筆言卷一  
丙子子奉 命祭西嶽西鎮登鳳翔靈山靈鷲寺  
見如來泥洹像諸弟子有悲泣者竊以爲疑適觀  
世說顧敷七歲言當由忘情故不泣未能忘情故  
泣尋味二語大有解會

康熙庚辰夏六月二十八日蒙 恩賜 御書帶

經堂扁額謹紀述于居易錄末卷今年壬午四月  
六日再蒙 恩賜 御書信古齋扁額回憶戊午  
夏初蒙 恩賜存誠格物二扁已二十五年矣二  
十五年中三蒙 御筆題 賜堂額榮寵踰涯宋  
學士蘇易簡獲賜飛白玉堂之署四字一時輒侈

爲盛事臣之蒙 恩何啻什倍恭爲摹刻懸于蓬  
華之居而什襲 御墨于寶積謹紀 頒賜年月  
以示世世子孫勿忘報稱云

壬午六月初九日 召集內閣九卿及翰詹卿寺  
科道各部郎中四品以上官于 保和殿傳上  
諭云尋章摘句華麗詞藻非帝王之本朕四十餘  
年惟日兢兢未嘗少釋萬幾自警有始無終之誚  
念茲在茲也政事之暇頗好書射歷年以來所積  
臨摹字幅 賜卿等觀之臣士禎得絹素大字一  
幅共二十七字云惟正是視玄黃匪惑非禮不觀



儀型是則慎爾所覲無愆斯德臨米芾首尾凡小

璽三曰淵鑒齋長寸餘闊八分白文康熙宸翰方一寸三分白文勅幾清

晏方一寸四分朱文是年七月二十三日恭紀

浙江鄉試廣額既奉 特旨允行順天府府尹錢

晉錫上疏以京畿國學首善之地請照浙江例增

廣解額禮部覆准順天等府廣額十人國學八人

奉天府一人宣化府一人八旗滿洲蒙古三人漢

軍一人共廣額二十人湖廣總督郭琇亦以湖南

北地大人衆援例疏請部覆准照浙江例廣十三

人可謂一時右文盛事然止順天國學浙湖三直

省而他省督撫未及疏請部議遂未之及未免向

隅矣至予鄉爲 孔子闕里所在解額六十名而

至聖裔四氏學二人即在解額之內則視他省尤

爲未均惜無言之者

梵言薛荔猶此言餓鬼出大藏服字函

盤山拙菴智朴和尚自江南還山以滄浪高唱畫冊

來索題蓋師訪宋牧仲開府于吳門適朱竹垞彝尊

太史自禾中來會于滄浪亭共賦詩見懷而畫史

高簡圖之者也宋詩云青溝闢就老煙霞瓢笠相

過道路賒攜得一餅豆苗菜菜名出盤山來看三月牡丹



香林齋詩卷一  
花因緣大事公能了潦倒麤官我自嗟好向滄浪  
亭子上梅檀香裏奉袈裟經行斜日且觀魚黃鳥  
緡蠻入耳初接席金風舊亭長竹垞懷人蠶尾老尚  
書阮亭春浚玉版容叅悟歲晚花宮待掃除拂子一  
揮仍小住空林明月暮鐘餘

提督山西學政翰林院侍讀汪灝以大同府人文  
勝前疏請撤去門字號照福浙總督侍郎郭世隆  
三十六年題請臺灣一府撤去至字號與通省一  
體勾中之例部覆得 旨允行

河南巡撫侍郎徐潮疏言二程子後裔五經博士

程佳璠病廢請以其子程舉承襲

明弘治中京口人錢寶者善醫嘗遊齊魯間遇  
老僧能臥大雪中雪為不積問其年數百歲矣後  
至金陵居天界寺撫摩能療諸疾後尹蓬頭客于  
錢氏錢偶言僧狀尹曰吾師祖也別來久尚以恙  
耶已而尹去老僧復至京口錢為述尹語僧曰是  
吾孫也徐出度牒示錢則唐大中四年所給已八  
百年矣僧秦人不知名字見外史

唐時升叔達三易集有南翔八老人詩序云南翔  
里有八老人為社徐爵九十六趙陸九十四陸淙



香林齋詩卷一  
八十五徐勳張樂俱八十四董儒八十三朱梓八  
十二陸球八十一居止不一二里而耄耆相望日  
杯酒談笑相娛樂誠太平盛事也詩云白鶴村頭  
春日曉香霧濛濛百花好蒼顏素髮八老人花前  
置酒相傾倒笑說鄰翁學語時追談邑子知名早  
不知主客更勸酬爭引曾玄互提抱今年孟春甲  
子晴占云麻麥俱豐成坐中祭酒九十六敬辭社  
翁旨且清其間迭起拜更祝但願脚健雙眸明桂  
林從事八十一只聞喚弟無呼兄南村翳翳桑榆  
日出且持杯歸散帙但課兒孫種黍苗何知道士

餐芝朮香山居士有遺篇九十不衰真地仙公等  
康健逢聖世能無旦莫歌皇天願炊香飯釀秫酒  
日奉杖履長周旋正嘉遺事多訛謬欲問鑿輿南  
幸年魏學禮長林片葉集有九峰青厓先生年一  
百二十一歲詩尤奇

樂府碧玉破瓜時而談苑載呂洞賓謁張洎贈詩  
云功成應在破瓜年洎後以六十四卒破瓜者二  
八也老少男女皆可稱破瓜亦奇

山海經云北號之山有木狀如楊赤華其實如棗  
而無核其味酸甘食之不癯此即吾鄉之虛中棗



也出青城縣漢上林苑有枏棗見西京雜記又東坡有與蒲傳正覓柿霜無核棗帖元遺山有跋見玉堂嘉話

異物彙苑巴旦杏出哈烈國今北方皆有之京師者實大而甘山東者實小肉薄少津液土人賤之不食獨其仁甘可以佐菹

漢上林令所記桃十種有櫻桃含桃含桃即櫻桃且非桃類

金剛鑽形如鼠糞色青黑如鐵石產西域諸國在鷲鳥海東青所遺糞中以之鑄鏤無堅不破右齊

東野語所記或云扶南國剛金能切玉扣以殺角則判張洪使緬錄云緬蠻地有木曰金剛纂狀如棕櫚枝幹屈曲無葉剉以漬水暴牛馬令渴極而飲之食其肉必死此又草木之毒者而名同京官舊例各衙門稱謂有一定儀注不可那移如翰詹稱老先生吏部稱選君印君員外以下稱長官科稱掌科道稱道長是也自康熙丙子祭告回京見聞頓異各部司及中行評博無不稱老先生者矣此亦觚不觚之一也

考工記韞人音運為臯陶鄭司農注臯陶古木也



徐渭路史一條云唐時高麗貢松煙墨和麋鹿膠造墨名隴糜此說杜撰陋甚按隴糜漢縣名地出石墨即今隴州之沂陽見于漢官儀其來舊矣非始于唐且與高麗無涉

青藤山人路史云中山酒中山兔毫竝是應天府之溧水縣非古中山也不知何據亦出杜撰

高季迪明三百年詩人之冠冕然其明妃曲云君王莫殺毛延壽留畫商岩夢裏賢此三家村學究語所謂下劣詩魔不知季迪何以墮落如此而肯者反以為警策其後有彭三五吾者又云畫師休盡

殺夢弼要人圖轉入魔道矣又胡虛白詠綠珠云枉費明珠三百斛荆釵那及嫁梁鴻郎瑛稱之皆所云癡人前不得說夢也若永叔耳目所及尚如此萬里安能制夷狄所謂詩論亦自近腐

以詹事府詹事兼侍讀學士徐秉義

前史部右侍郎

原任翰

林院侍講徐元夢

滿洲人

為順天考試官二君皆癸丑

科進士

郎瑛七修類纂舉東坡跋林和靖詩詩如東野不言寒書似西臺差少骨以西臺為南唐李建中謬甚南唐太弟太傅李建勳非建中也建中宋初人



為西京御史故稱西臺其書與楊風子先後齊名  
蘇黃常稱之即未知耶

剛卯或曰嚴卯見王莽傳或曰毅歧音開見說文玉

篇以正月卯日作而佩之服虔云長三寸廣一寸

四分晉灼曰長一寸廣五分或用玉或用金子于

慈仁寺市中曾見一枚乃以象牙為之八分書六

十六字又按後漢輿服志長寸二分方六分諸侯

王列侯以白玉中二千石以下黑犀三百石已下

以象牙

類纂載武林女子金麗卿詩家住錢塘山水圖梅

邊柳外識林蘇郎瑛謂其不能守禮出則擁蔽其  
面時方食不覺噴飯滿案 又謂謝無逸以胡蝶  
詩得名號謝胡蝶後李商隱襲其語云云則是以  
唐人蹈襲宋人矣更可一笑

已卯十一月熊青嶽太宰拜相時宛平胥庭王公  
為首揆沁州吳公銅川次之而孝感乃故相再入  
內閣或疑其位次王公云若熊公徑以大學士召  
還自當為首揆今以禮書召遷吏書而始大拜是  
由尚書大拜非以大學士召還也不當讓熊遂次  
吳而桐城張公敦復又次熊及王公引疾則丹徒



張公素存為首揆桐城請告歸矣

熊乃王教習門生也

御史劉子章條奏外官禁止多帶家口下吏部議督撫止許五十人藩臬四十人道府三十人州縣十五人違例者革職下九卿詹事科道集議予謂自督撫已下皆遞減十人胡為州縣之于道府頓減其半也衆躓之乃定為二十人而女口不與此數違例者止于降級再奉 旨以旗員差多許倍之

辛巳冬杪得倪雲林喬柯竹石小幅澹逸絕塵題字尤古勁真蹟也詩云隱士江陰許士雍鈿山湖

裏泊煙篷秋來鱸膾蓴羹美亦欲東乘萬里風後

署甲辰八月倪瓚

雲林故居在厚山地名厚陽

庚辰三月朝陽門外東嶽廟火殿廡皆燼獨左右

道院無恙 特發內帑并令在京在外大小官員

捐助仍以 裕親王監視之閱歲始畢工 親臨

幸焉廟中仁聖帝炳靈公司命君西丞相像皆元

昭文館大學士正奉大夫秘書監卿劉元所塑元

最善搏換之法天下無與比至是皆燬于火

羅泌路史云巢父友許繇豎繇居沛澤其道日

光堯朝焉而道之父適聞之洗耳于潁豎方飲其



牛乃毆而還子革注豎字仲父然則洗耳者巢父  
飲牛者則樊豎又別自一人妄說紛紛諸子識緯  
之書杜撰大抵如此可發一笑

蟲牢地名見春秋其地在今河南之封丘縣然路  
史雜國名又有蟲氏牢氏蟲氏條下曰邾地後有  
蟲氏牢下曰古牢子國後有牢氏

武會試舊無廷對臚傳之例有之自明末崇禎辛  
未科始從考試官方逢年之請也

王孟端仿雲林古木叢篁自跋云幽篁古樹玉森  
森白石仙人翠作襟夜月幾驚龍虎立秋風時聽

鳳皇吟畫圖入思曾飛筆山水留情獨撫琴不是  
遠尋高士宅何能愜我出塵心又季迪和東山逸  
叟和青箬谿道人四言一首

壬午順天鄉試五經監生二人一莊令輿江南武  
進人一俞長策浙江桐鄉人初以違例貼出仍具  
題請 旨奉 旨俱著授為舉人准會試嗣後願  
做五經者不必禁止作何定例九卿等詳議具奏  
九月初六日辰刻 文華殿經筵講官禮部尚書  
韓茨吏部左侍郎傅繼祖進講四書子路問政子  
曰先之勞之一節臣刑部尚書王士禛兵部右侍



郎兼翰林院掌院學士法良進講易經觀乎人文  
以化成天下一句講畢 賜宴太和門

初九日 東宮會講 持敬殿臣士禎以尚書侍

班詹事府詹事來道右庶子沈涵進講四書夫子  
之道忠恕而已矣二句右諭德覺和託修撰胡任

輿進講書經德無常師主善為師二句講畢 賜

茶 文華殿門

翰林掌院舊皆以學士兼禮部侍郎滿官漢官皆  
然自崑山徐相國以大學士兼掌桐城張相國以  
禮部尚書兼掌與往例不同然凡啓 奏講書等

事仍滿前漢後不論所居之本官也今長洲韓宗  
伯兼掌院事亦然

唐國史補謂漠漠水田飛白鷺陰陰夏木嘯黃鸝  
乃右丞竊取李嘉祐語論者或為王諱以為增漠  
漠四字便是點鐵成金手段此亦鑿語然此事往  
往有之予門人太倉崔舉人華字不雕貧而工詩  
嘗有句云溪水碧于前渡日桃花紅似去年時予  
在廣陵作論詩絕句四十首舉此二句云江南腸  
斷何人會只有崔郎七字詩後汪鈍翁在京師亦  
有句云溪水碧于前渡日桃花紅似去年人謂非



取崔前語乎汪于崔亦前輩也

譚輅云劉季緒好詆訶文章倚撫利病徐陵爲一代文宗未嘗詆訶作者昔予與故友汪鈍翁在京師鈍翁好詆訶人前輩自而下無得免者後進以詩文請質亦無恕詞予每勸之故友計甫草東嘗序予門人汪蛟門懋麟集云鈍翁性惰急不能容物意所不可雖百責不能揜其口也其所稱述於當世人物之衆不能數人焉阮亭性和易寬簡好獎引氣類然以詩文投謁者必與盡言其得失不少寬假此數語頗得予二人梗槩顧施

愚山又嘗謂予公好獎引人物自是盛德然後進之士學未有成得公一言便自詡名士不復虛懷請益非公誤之耶予思其言亦極有理

門人李少京兆子來

先復

言曩過漢中聞南鄭縣之

東有民家老嫗年百二十歲矣尚強健無恙李自往訪之云晨出往田間栽種未及見

廣州府佛山有諸生黃章者年一百二歲康熙己卯尚入省闈自言吾今科且未中來科百五歲亦未中至百八歲始當獲雋尚有許多事業出爲國家効力耳聞近歲已死其言無驗



九月二十五日 車駕南巡視河工

十月初九日夜再雪竟夜積素滿庭晚菊尚敷腴  
可玩晨起忍寒坐信古堂對雪看菊忽梁溪琴僧  
岳蓮見過彈平沙落鴈漢宮秋二曲古音蕭寥忘  
其身在長安官是秋曹之長也作二詩紀事

臺灣古荒服在福建東南大海中西界于漳南鄰  
于粵北與閩安相直其水道則東連日本南鄰琉  
球暹羅呂宋荷蘭諸國其沿革莫得而詳也明嘉  
靖四十二年流寇林道乾作亂都督俞大猷勦之  
追及澎湖道乾遁入臺灣大猷不敢偏留偏師駐

澎湖島時哨鹿耳門外徐俟其敝道乾遁往占城

道乾既去澎湖駐師亦罷天啓改元有顏思齊者  
為日本國甲螺猶頭目也引倭酋歸一王屯臺灣閩人鄭

芝龍附之始建平安鎮城既而荷蘭國人舟遭颶  
風至此愛其地借居之遂與倭約盡有臺灣之地  
而歲輸鹿皮三萬荷蘭國人善火器其居臺灣也  
以夾板船為犄角雖兵不滿千南北土酋咸畏之  
又建赤嵌城以居順治庚寅日本甲螺郭懷一謀  
逐荷蘭人事覺懷一被殺于歐汪在今鳳山縣界辛丑鄭成  
功自江南敗歸勢日蹙頓軍廈門適日本甲螺何



斌與荷蘭酋長隙潛誘成功進取臺灣鹿耳門詰  
屈回旋沙浮水淺猝難飛渡成功舟至水忽漲十  
餘丈巨艦縱橫畢濟遂克臺灣荷蘭國人與成功  
戰不利退保安平鎮城其酋歸一王以死拒之成  
功力攻不克乃環山列營以困之荷蘭人勢窮以  
十餘艘決戰成功用火攻盡焚之荷蘭人遁歸其  
國成功既有臺灣以赤嵌城為承天府改臺灣土  
城為安平鎮總名曰東都未幾成功死其子經居  
鷺江即今廈門成功弟世襲陰有竊據意經攻逐之世襲  
渡海來歸經僭立改東都曰東寧改縣曰州設安

撫司三南北路澎湖各一辛酉經死子克塽嗣康  
熙二十一年壬戌福建總督姚啓聖用間謀陰結  
傅為霖為內應事洩為霖遇害明年癸亥靖海將  
軍施琅奉命率舟師進討六月自銅山抵澎湖  
入罩灣連克虎井桶盤諸嶼誓師戒嚴鄭克塽奉  
表降詔赴京師隸旗下于其地設臺灣府統臺  
灣鳳山諸羅三縣隸福建布政使司云

十月二十七日 車駕回 宮

御賜內直吏部尚書陳廷敬副都御史勵杜納右  
諭德查昇各松花江石小研一方色澹綠如洮石



腹有 御書研銘八字云以靜為用是以永年繼  
又 賜大學士張玉書吳璵熊賜履工部尚書王  
鴻緒各一方鴻緒所得有倭漆研匣匣中有 御  
用墨四笏時十一月偶 召張及王入 南書房  
編次 御書得 賜因及吳熊二公云  
駕在德州 賜致仕在籍戶部左侍郎田雯寒綠  
堂扁額原任翰林侍讀蕭惟豫編修田需亦蒙  
賜 御書各一幅  
召戶部郎中陳奕禧入 南書房 命書大小字  
各三幅 賜御書 御製塞上詩一幅詩云半嶺

黃雲合風悲鼓角聞野蕪沙草外落日自成羣

御製宋高宗父母之仇終身不報論 命大學士

熊賜履禮部尚書韓茨 內直吏部尚書陳廷敬

右諭德查昇同作又 命浙江舉人查慎行原名嗣璉江

南舉人錢名世等同作進 呈

詔蠲甘肅等處地方四十一年四十二年錢糧江

南上江下江四十二年錢糧

十二月諸王內閣九卿翰詹卿寺科道請上 尊

號奉 旨朕即位四十餘年未嘗少刻不以民生

休戚為念遠邇安靜為本雖或慶雲景星嘉禾瑞



草天書麟鳳之奇總無關於黔黎亦無關於朕心  
反為史書之譏朕以實心為民天視天聽故有其  
道難免後人公論若耀功德取一時之虛名朕之  
不悅甚矣母煩數陳

上召海寧舉人查慎行武進舉人錢名世長洲監  
生何焯休寧監生汪灝于南書房屢試詩及制  
舉文特賜焯灝舉人明年一體會試

考試新差提督各省學政翰林侍讀學士張廷樞  
等郎中翁嵩年等十一人于南書房稱旨人

賜

御書一幅

八股題夫子循循然善誘人  
節詩題恭和御製考試嘆

壬午冬 駕歸自德州考試 內直諸詞林官至  
二十二日封印後一日始畢定一等十人侍讀學  
士陳元龍等二等若干人其三等五人調知縣用  
諭德王化鶴中允吳晟修撰戴有祺辛未狀元檢討趙爾  
孫吳文炎

命吏部右侍郎吳涵兼掌翰林院事

山行慮迷握嚮蟲一枚于手中則不迷見物類相  
感志虞山先生作嚮言取此

明文士如桑悅祝允明皆肆口橫議略無忌憚悅  
對丘文莊言舉天下文章惟悅其次祝允明世但



嗤其妄人耳允明作罪知錄歷詆韓歐蘇曾六家  
之文浚文周內不遺餘力謂韓傷易而近僂形麤  
而情霸其氣輕其口誇其發踈躁歐陽如人畢生  
持喪終身不被袞繡東坡更作僂浮的爲利口譁  
獷之氣肆溢舌表使人奔迸狂顛而不息曾王既  
脫衣裳并除爪髮譬之獸齧腊骨至于老泉穎濱  
秦黃晁張則謂不足盡及惟柳如冕裳珮玉猶先  
王之法服乃其大旨則在主六代之比偶故實吁  
亦鄙而倍矣論唐詩人則尊太白爲冠而力斥子  
美謂其以村野爲蒼古稚魯爲典雅麤獷爲豪雄

而總評之曰外道李則鳳皇臺一篇亦推絕唱狂  
諄至于如此醉人罵坐令人掩耳不欲聞論詩餘  
則專祖太白飛卿稍許歐晏周柳以爲綴旒謂東  
坡木強踈脫少游魯直特市廛小家之子略舉大  
端如右所謂無忌憚者不足置辨也

西園雜記記明大臣壽考者自王端毅公魏文靖  
公而下十三人而不及雒陽劉文靖公晦菴文靖  
壽九十餘近百歲又弘正名相也何獨遺之  
釋氏言羚羊挂角無跡可求古言云羚羊無此子  
氣味虎豹再尋他不著九淵潛龍千仞翔鳳乎此



是前言注脚不獨喻詩亦可爲士君子居身涉世之法

大竹破山和尚天童密弟子也蜀亂後居萬峰賊李鷄子者殘忍嗜殺延師供養請肉食師曰公不殺人我便食肉李笑而從之全活無算師蹇姓忠定公之裔孫也

鄭端簡云十哲陳蔡一時與難之賢非孔門定論自開元至今無敢議者夫有若之言四見于論語大類聖人公西赤志于禮樂有爲邦之才不遠優于宰我再求乎求我言行不必徵諸史傳論語中

多有之矣其視二子優劣何如宜進祀二子于殿上改求我于廡中右與予官祭酒時具疏大意略同惜爲友人中阻疏不果上即當時禮部未必果行要當存此一段公論于天下後世耳予至今悔之

皮日休本字逸少後字襲美見北夢瑣言

康熙乙丑夏予使粵東還便道遊廬山宿開先寺觀陽明先生石壁六書紀功碑末云嘉靖我邦國若前知世宗入繼大統者按碧里雜存陽明既平田州之亂先是州有巨石側臥江濱舊有童謠云



田石傾田州兵田石平田州寧岑猛惡之夜遣人  
平之明復如故先生定亂後其石即平先生自往  
觀之洗剔苔蘚有古刻新建伯三大字異之遂續  
加九字併刻于石云嘉靖歲戊子新建伯王守仁  
又記先生習靜陽明洞預知門人朱白浦蔡我齋  
入山事中庸云至誠之道可以前知陽明其庶幾  
乎

樂郊私語云海鹽少年多善歌蓋出于澗川楊氏  
其先人康惠公梓與貫雲石交善得其樂府之傳  
今雜劇中豫讓吞炭霍光鬼諫敬德不伏老皆康  
惠自製家僮千指皆善南北歌調海鹽遂以善歌  
名浙西今世俗所謂海鹽腔者實發于貫酸齋源  
流遠矣

香祖筆記卷一終



香祖筆記卷二

新城王士禎貽上

異物類苑云山都人面黑長身有尾踵見人則笑  
笑則上脣掩目按諸書言人都烏都猪都皆不爾  
此乃誤以狒狒為山都耳

僅字有少餘二義唐人多作餘義用如元微之云  
封章諫草繁委箱笥僅逾百軸白樂天哭唐衢詩  
著文僅千首六義無差忒小說崔燁傳大食國有  
陽燧珠趙佗令人航海盜歸番禺僅千載矣甘澤  
謠陶峴傳浪跡怡情僅三十載撫言曲江之宴長



香齋筆言卷二  
安僅于半空玉壺清話南唐先主傳吳越災遣使  
言之賚帑幣糧僅百餘艘之類至宋人始率從  
少義迄今沿用之

令狐子先安陸高士予嘗著之古權錄矣王彥輔  
塵史載其著書甚多有萬卷錄易說精義晉年統  
緯世惣樂要注默書讒髓琴譜兵途要轄等若干  
卷又云令狐先生卒阮逸天隱表之林逸書孟逸  
篆額號三逸碑

南齊侍中庾杲之家貧每食生韭熟韭韭菹時人  
爲之語曰孰謂庾郎貧每食二十七種後魏陳留

侯李崇爲尚書令性儉恠食止韭菹其客李元佑  
戲語人曰李令公一食十八種問其故答曰二九  
一十八二事極相似

詩話云嘗與陳臥子共宿問其七言律詩何  
句最爲得意臥子自舉禁苑起山名萬歲複宮新  
戲號千秋一聯然予觀其七言殊不止此如九龍  
移帳春無草萬馬窺邊夜有霜左徒舊宅猶蘭圃  
中散荒園尚竹林禹陵風雨思王會越國山川出  
霸才石顯上賓居柳市寶嬰別業在藍田七月星  
河人出塞一城砧杵客登樓四塞山河歸漢闕二



陵風雨送秦師諸聯沉雄瑰麗近代作者未見其  
比殆冠古之才一時瑜亮獨有耳

彈碁之戲始見西京雜記後漢梁冀傳注稍詳之  
似近投壺而其製不傳今人詩多以奕碁當之可  
發一笑王建宮詞云彈碁玉指兩參差背局臨虛  
鬪著危先打角頭紅子落上三金字半邊垂讀之  
亦不能通曉也

揮塵新談記費鶯湖初第謁彭文憲文憲曰殿上  
金階滑須慢慢行吾鄉高念東侍郎有句云金  
階路滑且徐行本此

唐蕭倣咸通四年知禮部貢舉責授蘄州刺史有  
與浙東鄭大夫書云韓綰即文公之孫柳告是柳  
州之子鳳毛殊有而名字陸沉皆倣是年所舉士  
也

千里馬人皆知之王兆雲湖海搜奇載陝西民家  
有千里驢腰有腎六又張翁言有友人省親山東  
親家以一驢至曰此千里驢也乘之倏忽抵家  
唐人五言絕句往往入禪有得意忘言之妙與淨  
名默然達磨得髓同一關揆觀王裴輞川集及祖  
詠終南殘雪詩雖鈍根初機亦能頓悟程石腰有



絕句云朝過青山頭暮歇青山曲青山不見人猿  
聲聽相續予每嘆絕以為天然不可湊泊予少時  
在揚州亦有數作如微雨過青山漠漠寒煙織不  
見秣陵城坐愛秋江色山青蕭條秋雨夕蒼茫楚江  
晦時見一舟行濛濛水雲外上江雨後明月來照見  
下山路人語隔溪煙借問停舟處惠山下鄒山堂振  
法鼓江月掛寒樹遙送江南人鷄鳴峭帆去焦山曉  
嶺還又在京師有詩云凌晨出西郭招提過微雨日  
京口出不逢人滿院風鈴語早至天皆一時佇興之言知  
味外味者當自得之

南昌陳士業

弘緒

言嘗登泰山日觀峰四更起候日

出見霞彩萬道碧綠交加有赤盤從中涌出晃漾  
不定久之乃成日輪因悟氣至此始聚而為日日  
生一日非以昨日之日復為今日之日也新吳宋  
長庚亦有此論此說甚奇山海經云羲和二國名  
每日出二國人為御推升太虛語尤荒誕可笑  
七言律聯句神韻天然古人亦不多見如高季迪  
白下有山皆遶郭清明無客不思家楊用修江山  
平遠難為畫雲物高寒易得秋曹能始春光白下  
無多日夜月黃河第幾灣近人節過白露猶餘熱



秋到黃州始解涼瓜步江空微有樹秣陵天遠不  
宜秋釋讀徹一夜花開湖上路半春家在雪中山  
皆神到不可湊泊

錢武肅王目不知書然其寄夫人詩云陌上花開  
可緩緩歸矣不過數言而姿制無限雖復文人操  
筆無以過之東坡演之爲陌上花三絕句云陌上  
花開胡蝶飛江山猶是昔人非遺民幾度垂垂老  
遊女還歌緩緩歸五代時列國以文雅稱者無如  
南唐西蜀非吳越所及賴此一條足以解嘲

韓蘇七言詩學急就篇句法如鴉鷓鷹鴈雉鷓鴣

騅駟駱駝駟駟駟等句予既載之池北偶談近又  
得五言數語韓詩蚌螺魚鼈蟲盧仝鰻鱸鮎鯉鱸  
鷓鴣鷓鴣鳧蔡襄弓刀甲盾弩筋皮毛骨羽然此  
種句法間作七言可耳五言即非所宜解人當自  
知之

武林女子王倩玉貌甚美而工詩詞已字人矣悅  
其中表沈生適聲而越禮焉母家訟于官杭守弋  
琕斷離鬻于駐防旗下沈百方贖歸復爲沈生一  
女而死傳其寄沈長相思一闕云見時羞別時愁  
百轉千回不自由教奴怎罷休懶梳頭怯凝眸明



月光中上小樓思君楓葉秋雖淫奔失行其才慧亦尤物也

癸未正月十六日 大駕南巡視河工

上諭官民人等及革職降級官員贖罪人犯願赴山東被災地方泰安州沂州新泰蒙陰郟城等縣賑濟饑民者列名以聞事畢議叙

會試總裁官東閣大學士兼禮部尚書熊賜履吏部尚書陳廷敬吏部右侍郎兼掌翰林院事吳涵禮部右侍郎許汝霖

本朝惟高陽李文勤公三典會試今孝感熊公以

癸丑甲戌丁丑庚辰癸未五典會試澤州陳公以壬戌辛未癸未亦三典會試可謂盛事按明二百七十年惟金谿王公英永樂戊戌宣德庚戌正統壬戌三典會試耳

臺灣風信與他海殊異風大而烈者為颶又甚者為颶颶條發條止颶常連日夜不止正二三四月發者為颶五六月發者為颶九月則北風初烈或至連月為九降過洋以四七十月為穩以四月少颶七月寒暑初交十月小春天氣多晴暖故也六月多颶九月多九降最忌颶颶俱多挾雨九



降多無雨而風凡颶將至則天邊有斷虹先見一片如船帆者曰破帆稍及半天如鬣尾者曰屈鬣一番識風草草生無節則一年無颶一節則颶一次多節則多次颶之名以時而異正月初四日曰接神颶初九日曰玉皇颶十三日曰關帝颶念九日曰烏狗颶二月二日曰白鬚颶三月三日曰上帝颶十五日曰真人颶念三日曰馬祖颶真人多颶馬祖多雨已上春三月共三十六颶此其大者四月八日曰佛子颶五月五日曰屈原颶十三日曰關帝颶六月十二日曰彭祖颶十八日曰彭婆颶念四日曰

洗炊籠颶七月十五日曰鬼颶八月一日曰竈君

颶十五日曰魁星颶九月十六日曰張良颶十九

日曰觀音颶十月十日曰水仙王颶念六日曰翁

爹颶十一月念七日曰普菴颶十二月念四日曰

送神颶念九日曰火盆颶念四日已後皆曰送年

風按升菴先生云颶當作颶音貝

鳳山縣有薑名三寶薑相傳明初三寶太監所植

可療百病

諸羅縣番首名大厝者每歲東作時諸番請其出射射所及之地稼輒大熟號靈箭



正月二十七日前少傅兼太子太傅保和殿大學士兼禮部尚書王熙卒公禮部尚書文貞公崇簡長子也順治丁亥進士父子同官禁林又同為學士康熙壬戌以兵部尚書大拜居政府者二十年辛巳以病予告至是卒年七十六 賜謚文靖王文貞公六子長熙保和殿大學士禮部尚書次禎桃源縣知縣次然廣西布政使司布政使次照浙江金華道叅議次燕貴州巡撫都察院副都御史次默刑部郎中閎閱之盛時無其比

二月二十九日放榜會元王式丹

江南寶應人

康熙中以尚書拜相者或進部銜如宛平王胥庭熙相國以司馬大拜而進兼禮部尚書京江張素存玉相國以宗伯大拜而進兼戶部尚書是也其後吳沁州銅川璠以刑部尚書大拜止兼本部浙江巡撫張泰交以士民公籲請前巡撫陞浙閩總督謚忠貞范承謨春秋特祀允行湯調鼎淮之清河人順治初進士著辨物志議論多發人神智偶筆其記人參二則于此隋高祖時上黨民宅後闢人呼聲求之得人參一本根五尺餘具體人狀占者謂晉王陰謀奪宗故妖草生子



曰非妖也人參如人形者食之得仙根至五尺而具人狀蓋歲久神靈之物而上黨又人參之所出惜時無張華其人故其物不著而以為陰謀奪宗之應文帝以丞相僭帝位何嘗不以陰謀得哉又元覽云人參千歲為小兒枸杞千載為犬子按參以人名伏土歲久而具體人狀氣類神靈之感無足怪者枸杞字不從犬何以歲久為犬廣韻云春名天精子夏名枸杞秋名却老根冬名地骨皮是枸杞特四名之一考山海經建木上有九橰下有九枸枸根盤錯也與犬義絕不相涉使枸杞而為

犬天精却老地骨皮又何化乎

人參譜

呂與叔記二程子語云今日釋氏未消理會大患者在介甫之學譬之盧從史在潞朝廷將討之當時便使一處逐節度使朝議欲討之而李文饒之意必欲先討潞州則不必治彼而自敗今日却要

先整頓介甫之學壞了學者

程子云詩小序必是當時人所傳國史明乎得失之迹者是也不得此何緣知此篇是甚意思大序則是仲尼所作要之皆得大意朱子學宗二程子詩序獨不然何也



伯淳道君實語自謂如人參甘草病未甚時可用  
病甚則非所能及愚謂熙寧之病已甚矣溫公一  
出而立起膏肓天下咸如更生天不祚宋遂使公  
年不永豈云非所及哉

三月十五日 上南巡視河回 宮內閣九卿迎  
駕于南海子西紅門

四川巡撫貝和諾請復設蜀省五十七學學官下  
禮部議覆得 俞旨允行

謝在杭肇瀾小草齋詩話殊多憤憤啓發人意處  
絕少如云詩境貴虛故仙語勝釋釋語勝儒夫仙

語如步虛辭等最易厭釋語入詩最近雅今乃反  
之豈非強作解事者惟所云王右丞律選歌行絕  
句種種臻妙圖繪音律獨步一時尤精禪理晚居  
輞川窮極山水園林之樂唐三百年詩人僅見此  
耳如云明詩遠過于宋又云本朝僅數名家力追  
上古然刻畫摹擬已不勝其費力矣其他作者雖  
復如林上乘雋語人不數篇要其究竟尚不及宋  
宋人有實學而本朝多剽竊故也右二條自相矛  
盾當以後論爲允又云國初詩林鴻高啓尚矣鴻  
一意盛唐而啓雜出元白長吉失鴻之爲盛唐廣



鼎耳安得與啓竝稱而且語有軒輊此真齊人之  
知有管晏而已又云李西涯樂府野狐外道夫西  
涯樂府雖變體自是天地間一種文字弇州晚年  
尚爾服膺遽斥之爲野狐外道可乎約略駁正數  
端以例其餘至外篇雜篇以下多載晚唐五代宋  
元詩無可采者正與劉後村詩話同耳

三月十八日 萬壽節大赦天下

十九日赴暢春苑啓奏刑部釋放囚犯八百餘人  
是日請 旨 御批又減等二十一人

二十六日巳刻文華殿經筵滿禮部尚書席爾達

漢禮部尚書韓茨進講知者樂仁者壽二句滿吏  
部左侍郎傅繼祖漢詹事府詹事徐秉義進講易  
經其德剛健而文明三句講畢 賜宴太和門

上南巡畿輔在籍諸臣迎 駕 詔復原任禮部

右侍郎田種玉國子監司業劉芳喆御史戈英原  
官至江南 詔起用原任河南巡撫侍郎顧汧翰  
林編修楊瑄加檢討尤侗侍講復內閣學士盧琦  
諭德秦松齡檢討潘耒徐鉉馮勛御史吳震方等  
原官

二十八日午刻 東宮會講工部右侍郎兼詹事



來道洗馬張豫章進講興於詩三句庶子常壽修  
撰胡任輿進講說命慮善以動動惟厥時二句講  
畢 賜茶文華殿門

特賜江南舉人汪灝何焯蔣廷錫三人與癸未科  
會試中式舉人王式丹等一體 殿試

宋中丞牧仲得王介甫唐百家詩選殘本自第五  
卷王昌齡李頎起至第八卷錢起盧綸司空曙止  
又自十三卷王建起建詩二卷  
逸上卷至十六卷許渾止中  
間第六卷沈千運已下全取元次山篋中集而益  
以李嘉祐等七人通三十八家蓋亦詳于中晚而

略于初盛宋人選唐詩大概如此意初唐盛唐諸  
人之集更五代亂離傳者較少故也牧仲謂今所  
傳十卷是章安楊蟠所改竄非介甫元本此雖闕  
本而真面目尚在山陽閻百詩若據云曾見閻賈持  
翻刻本正二十卷惜無從覓之近牧仲有書至云  
已購得全本方刻之吳門云

三月二十五日 特命 皇長子臨故少傅大學  
士王熙之喪拜奠舉哀 特恩異數都人驚傳以  
為未嘗有也 上諭以 世祖皇帝舊臣故加殊  
禮內閣部院諸臣公疏謝 恩報聞



四月初四日 殿試初七日傳臚狀元王式丹會元

江南寶應人榜眼趙晉福建閩縣人探花錢名世

江南武進人是科以違式黜者三人吳時寬沈淇雷曾

十五日引見癸未科進士選汪灝等四十九人為

庶吉士與鼎甲三人同入館讀書

十二日在暢春苑 御試庚辰科鼎甲汪繹等及

庶吉士十七日 命下留館授職者十三人顧圖

河甲戌一汪繹季愈皆鼎甲餘庶吉士滿漢共十人

戊辰庶吉士梁佩蘭張尚瑗辛未庶吉士狄億皆外用者共三十一人

東閣大學士兼吏部尚書熊賜履以老病請告允

之仍令居京師備 顧問

以吏部尚書陳廷敬為文淵閣大學士兼吏部尚

書

以副都御史勵杜訥為刑部右侍郎刑部侍郎金

璽以前任湖廣巡撫紅苗事調用

以直隸巡撫兵部侍郎李光地為吏部尚書仍管

巡撫事

鄞縣同年史及超少宗伯前身為僧大成子既書

之池北偶談第二十六卷癸未二月與同年屠少

司馬芝岩忠粹會于僧舍屠亦鄞人也因訊及史事



屠言其邑人戎通叅上德前身亦僧也嘗以鐵鍊鎖項募緣市中通叅之父戎翁者嘗施齋供與之善後僧化去而通叅以是日生亦夢僧入其室按宋相史彌遠乃覺長老後身即宗伯之先也

唐武后遊石淙倡和詩首御製自皇太子相王以下和者十六人相王之後次梁王武三思次內史狄仁傑次奉宸令張易之麟臺監中山縣開國男張昌宗又次鸞臺侍郎李嶠鳳閣侍郎蘇味道夏官侍郎姚元崇奉宸大夫汾陰縣開國男薛曜書久視元年五月刊于平樂澗之北崖諸詩惟李嶠

沈佺期二篇差成章餘皆拘拙可資笑柄耳黃岡葉井叔封知登封縣撰嵩陽石刻集記始著錄之而刪去九首不為無見而朱竹垞太史憾其闕略以得覩全碑為喜則亦好奇之過也當牝朝淫昏之世二張每待行幸預倡和已令千古齒冷而列銜于李嶠蘇味道輩之前諸人亦俯首甘之當時君臣上下豈復知有羞惡之心哉

文海披沙記筆之異者鍾繇張芝王右軍皆用鼠鬚歐陽蘭臺用狸毛為心蕭祭酒用胎毛為柱張茂先用鹿毛陶隱居用羊鬚鄭虔謂麝毛一管可



書四百紙狸毛可書八百紙又有豐狐蚰蛉龍筋  
虎僕及猩猩毛狼毫雖奇品而醇正得宜不及中  
山兔毫若淇源之鴨毛雀雉毛但取五色相間爲  
觀美耳今吳興兔毫佳者直百錢羊毫僅二十分  
之一貧士多用之然柔而無鋒臧懋循欲取貂鼠  
毛爲之輔以兔毫謂鍾王所用鼠鬚必此也然稍  
肥舉落運用不如人意已上謝在杭所記備矣近  
日湖州專用羊毛殊柔軟無骨形貌亦醜貂鼠珍  
貴專爲貴人裘帽之用筆工當何從購之  
李滄溟食饅頭欲有蔥味而不見蔥唯蔡姬者所

造乃食其法先用蔥不切入餡而留饅頭上一竅  
候其熟即拔去蔥而以麩塞其竅此謝在杭文海  
披沙所載即所謂蔡姬典盡舊羅裙者也

揚州銀杏樹內有觀音大士像寧波洛迦山石有  
大士竹林鸚鵡像予皆載之池北偶談閱文海披  
沙一則云永州蘇山多石淋以水鋸破中有觀音  
彌勒寒山拾得等像西方聖人神道設教理或然  
也

吾鄉風雅盛于明弘正嘉隆之世前有邊尚書華  
泉後有李觀察滄溟滄溟集盛傳于世華泉集一



刻于胡中丞可泉再刻于魏推官允孚又逸豪六  
卷刻于王方伯桃溪又有李中麓太常選本山西  
臺察趙侯齋刻于太原予所及見者前三本而中  
麓選本獨未之見諸本亦漸就漸滅矣康熙己卯  
予乃選刻于京師凡四卷子兒啓涑以予私淑先  
生之切也移書宗姪革訪其後裔久之革乃詳其  
家世報涑曰先生二子長子翼以廕官光祿寺丞  
其後無聞次子習歷城諸生字仲學號南洲有詩  
名習子治禮治禮子節節子庶皆以諸生奉祀事  
庶子材材子紹祖自先生至紹祖凡七世其家尚

有先生畫像云先生祀郡邑鄉賢其奉祀至材始  
失之材今年老為人佃田紹祖始十餘歲亦失學  
傭工辛巳予假歸涑乃為予述之而濟南諸生某  
某以書導材攜紹祖及先生畫像謁予里第比予  
過郡因與巡撫王中丞東侯提學徐僉事章仲備  
言先生名德而後裔僅有存者遂以紹祖奉先生

祀焉

先生墓在萊  
莊亦革云

黃子鴻名儀常熟人隱居博學工書法予刻漁洋  
續集將仿宋槧苦無解書者門人崑山盛誠齋侍  
御符聞子鴻多見宋刻獨工此體因禮致之子鴻



欣然而來都無厭倦今續集自首迄尾皆其手書也尤工小詞有句云井桐休放月痕來玉階剛臥金鈴犬人多稱之

安丘劉憲石相國正好為詩嘗賦從軍行云匣裏

雙雄劍腰間兩石弓蓬蒿真浪死何必怯遼東後竟以事隸旗下人以為詩識

江南蘇松糧儲道叅議馬逸姿疏言臣父瑯原任永嘉縣知縣康熙十三年值逆藩耿精忠之變與溫處道臣陳丹赤恪守臣節同時殉難荷蒙 皇恩矜恤屢下 溫綸從優議叙贈臣父浙江布政

使司叅政蔭一子入監併 賜葬祭康熙三十六年撫臣疏請于温州府建雙忠祠復荷 俞允先是三十五年丹赤蒙 特恩賜謚三十八年 皇上南巡幸浙丹赤子湖州府知府一夔恭迎 聖駕復荷 軫念 御書扁額懸之忠祠榮被萬世臣父瑯殉難與丹赤同時 賜祠又復同祀仰 懇 皇上破格一體 賜謚賜額昭垂萬世云云禮部議覆奉 旨馬瑯著與謚旋 賜謚忠勤 抵輓二獸名秉心忠直今承天門內華表頂上者是又衛輝府前石亦是按此亦蒲牢屬肩蚩吻



眦之屬而龍生九子不載其名

世傳羿妻奔月謂之嫦娥亦曰蟾蜍又酉陽雜俎  
月中有一人斫桂樹名吳剛又云月中仙人名宋  
無忌何月中人物之紛紛耶又鬱華一名鬱儀奔  
日之仙結璘奔月之仙見七聖記

鈕玉樵琇云有王秋山者工為拏畫凡人物樓臺  
山水花木皆于紙上用指甲及細針拏出設色濃  
淡布境淺淡一法古名畫按拏當作玊音築字書  
以手拏物也近閩中有織畫乃破紙為條織成之  
山水人物花鳥布置設色種種臻妙與刺繡無異

亦奇技也

南海友人陳元孝

恭尹

作狻賦其文甚工予按陸佃

云狻尾作金色俗謂金線狻一名狻狻獼猴也楚  
人謂之沐猴甚愛其尾毛柔長可藉宋制官二品  
狻坐不言食猴又按石狻獸名食猴則元孝之賦  
當作石狻為是狻音菊異物類苑云狻如師子蒼  
黑色瞑目聳耳出武當山又黃山志盧狄似穿山  
甲而無鱗嗜猿及蜂每呼羣猿至羅跪于下擇肥  
者以木葉覆其頂而食之

山海經何羅魚出譙明山譙水中聲如吠犬食之



已瘡今登萊海上三月何羅魚始至味甚美即寧  
波之鮫也

谷音三卷皆宋末人詩上卷王澹以下凡十人率  
任俠節義之士下卷詹本以下凡十五人則藏名  
避世之流也番陽布衣瀟湘漁父以下五人不可  
得其姓字要之皆宋之逸民也其詩慷慨激烈古  
澹蕭寥非宋末作者所及是時謝舉羽林霽山輩  
皆以文章節義著于東南而又有此三十人者與  
之遙為應和亦奇矣此書毛氏汲古閣本與月泉  
吟社合刻最工叻友施愚山備兵湖西又嘗刻之

清江蓋杜清碧其郡人也適見黃少司馬雪洲集  
記此書初得之臨淮顧德光氏後又見江西刻本  
多帝虎陶陰之憾間託南都博洽之士是正稍復  
其真虞部主事吳時冕見而愛之遂刻諸真州分  
署以傳知弘正以來此書蓋不一刻矣集中諸人  
本末各有耿耿不沒者宜有神物在在護持之也  
黃名瓚字公獻揚之儀真人

五月十五日

朝退

御乾清門

賜滿漢大學

士尚書侍郎

御書扇各一

士禎

得

御製虎丘

五言律詩一首

前有賜春小印後有康  
熙宸翰稽古右文二印



袁海叟詩集若干卷康熙壬午雲間門人周庶常  
彙策銘所寄鈔本用羅紋箋寫之甚工有大復空  
同二序陸儼山序又董宜陽題編首謂海叟手定  
國初刻于張氏者久燬儼山編次為別本而陸序  
云海叟集舊有刻又別有選行在野集者暇日與  
獻吉共讀之又刪次為今集云按明初詩人共推  
高季迪為冠而大復獨以海叟為冠空同許為知  
言今讀其詩古詩學魏晉近體學杜皆具體而微  
耳遠躋之青丘生之列未免失倫故予謂從來學  
杜者無如山谷山谷語必已出不屑裨取杜語後

山簡齋之屬都未夢見況其下如海叟者乎

詩小序必不可廢古今通儒論皆如此然如郝楚  
望之每一詩必駁朱注亦自不可常熟顧大韶仲  
恭欲刊定一書用毛傳為主毛必不可通然後用  
鄭毛鄭必不可通然後用朱毛鄭朱皆不可通然  
後網羅羣說而以己意折衷之嚴粲詩緝作于朱  
注之後獨優于諸家大全之作敷衍朱注全無發  
明用覆醬瓿可也此論最公

仲子傳

益都孫文定公泚亭廷嘗撰顏山雜記四卷極稱  
簡核然于建置設官緣起猶未詳按黃瓚雪洲集



議礦盜一疏是瓚巡撫山東時所奏略云臣會同  
鎮守太監黎鑑巡按山東監察御史王相徐冠議  
照禦盜之法本非一端要在術以防之令以禁之  
嚴逐捕以銷之足衣食以安之而已前項礦賊勢  
雖頗衆其初實倡於一二不逞之徒而市井無賴  
與凡窮困無聊者遂相率而從之臣等查得青州  
府益都縣去郡二百餘里地名顏神鎮土多煤礦  
利謙審治四方商販羣聚於此其中時有不逞之  
徒此巡海道副使潘珍先有開立縣治之議今有  
特設通判之請固欲得其要害而治之誠有見也

但鄰近州縣復多徒黨亦未得專事乎此而遽遺  
於彼也合無准照副使潘珍及左布政使姚鏞右  
布政使盛應期按察使王泰署都指揮僉事馬愷  
分守左叅政許淳分巡僉事魯鐸所議於益都縣  
顏神鎮地方聽令壘石爲堡建立府館一所添設  
捕盜通判一員許其兼制前項鄰近州縣舊有礦  
洞不時巡察新編總甲嚴爲約束操練弓兵民快  
人等遇有盜賊小則密謀發卒以收掩捕之效大  
則移文糾衆以成合擊之功務在斷絕奸萌毋令  
復相屯聚示已往于不究開方來以自新則賊黨



自此可消矣云云紀略以爲正德十二年巡按御史黃某奏請兵部覆准蓋未詳也但黃疏有聽壘石堡之語而顏城實嘉靖三十六年王弇州世貞兵備青州時建則正德中止設官而未建城耳黃雪洲同畢嘉會送馮憲副還浙一首廣陵淹畢誠越山老馮唐兩賢師友間力障波瀾狂翩翩遊子衣獨與朔鴈翔汲古尚董井銷魂更雷塘胡然歌式微綵服戀故鄉驚心濟南叟桃李空門墻江籬未堪折遠思憑誰將嘉會吾邑大司空畢公亨也公官兩淮運使爲茶陵李相所重卒爲名臣止

從釣臺集得其一詩餘不槩見偶閱黃集錄之備公故事云

余自少年與先長兄考功同上公車每停驂輟輒輒相倡和書之旗亭驛壁率不留彙諸同人見之者後在京師往往爲余誦之恍如昨夢近見吳江鈕玉樵瑋觚賸亦載余逸句因憶丙午自里中北上戲題德州南曲律店壁一絕云曲律店子黃河亦地名座朝來一雨清風霾青松短壑不能住騎驢又踏長安街語雖詼嘲不足存亦小有風趣聊記于此



香社筆言卷二  
今京師宴席最重鹿尾雖猩唇駝峰未足爲比然  
自唐已貴之陳子昂塵尾賦云卒網羅以見逼受  
庖割而罹傷豈不以斯尾之有用而殺身于此堂  
爲君雕俎之羞厠君金盤之實云云若六朝已來  
則以麀尾爲談柄耳未聞充盤俎也耶律楚材西  
域詩亦以鹿尾駝蹄作對

韓宗伯茨所居在宣武門外與胡侍講任輿爲鄰  
韓逝未浹月胡亦病卒胡甲戌狀元也乙丑狀元  
陸侍講肯堂先卒于此宅陸是科會元胡甲子江  
南解元皆兩掄元樊川詩云家住城南杜曲旁兩

株仙桂一時芳禪師都未知名姓始信空門意味  
長諒哉

括異志述吳地記云昔有金牛糞金村民臯伯通  
逐之牛入山穴山頽兄弟皆死妄語無稽豈又一  
金牛耶又一臯伯通耶吳地記又云漢議郎臯伯  
通字奉卿卒葬胥門號伯通墩則伯通非村民又  
不死于山矣

古今論世者以尹吉甫爲名臣徒以伐獫狁及崧  
高烝民韓奕江漢四詩耳吾獨疑吉甫惑後妻之  
言至使其子伯奇衣苔帶藻作履霜之操此與晉



獻驪姬之事何異夫不能齊家而妄稱之曰萬邦  
為憲吾不信也其猶後世詞人之諛韓侂冑賈似  
道者動以伊周擬之其又足信乎

姚士麟叔祥言曾見趙松雪自書家用薄運筆精  
妙凡養蠶種桑等事與今不殊惟用麩作食及烏  
豆之類動至百斤百石耳

姚叔祥又言海鹽有優兒金鳳以色幸于嚴東樓  
非金則寢食弗甘金既衰老而所謂鳴鳳記盛傳  
于時于是金復塗粉墨扮東樓焉此一事較侯方  
域馬伶傳更奇

見只編云蘭谿魏某嘗客華州王槐野祭酒家見  
架上有夏國書凡閱三旬始遍則此書較契丹志  
金志卷褻尤多矣右二志予皆有鈔本夏國志則  
世罕知之

明代自南部入閣者甚少惟萬曆丁未葉文忠向  
高以南京吏部侍郎徑授禮部尚書東閣大學士  
文忠是時年四十九

鄭端簡古言云永叔毀繫辭君實詆孟子安石非  
春秋二程子改古大學晦菴不用子夏詩序皆不  
可解



香祖筆記卷二終

卿詩云一入雕籠奪翠裳羽毛新得染鷲黃此與  
漢赤鴈朱鷲隋宦官劉繼詮獻芙蓉鷗皆異物也  
熊掌最難熟故楚靈王請食熊蹯而死明秦府王  
孫不羈云用草繩匝掌煮之則易熟  
今世公卿士大夫下逮輿隸婦女無不嗜煙草者  
田家種之連畛頗獲厚利考之本草爾雅皆不載  
姚旅露書云呂宋國有草名淡巴菰一名曰金絲  
熏煙氣從管中入喉能令人醉亦辟瘴氣搗汁可  
毒頭蝨初漳州人自海外攜來莆田亦種之反多  
于呂宋今處處有之不獨閩矣



山水豹遍身作山水紋故名萬曆乙卯上高縣人  
得一虎身文皆作飛鳥走獸之狀

我嶠瓦屋山出貔貅常誦佛號予隴蜀餘聞載之  
雅州傅良選進士云其鄉蔡山多貔貅狀如黃牛  
犢性食虎豹而馴于人常至僧舍索食

獨獸名似猿而大能食猿猿性羣獨性特猿鳴三  
獨鳴一見五侯鯖

宣和畫譜所載最古者吳曹弗與耳畜獸首晉史  
道碩按西京雜記漢元帝時有安陵陳敞新豐劉  
白龔寬竝工為牛馬飛鳥下杜陽望樊育尤善布

色皆與毛延壽同誅然則畜獸花鳥之類漢已多  
有不獨文翁石室畫古聖賢像而已若山水則後  
起者也

石蛙音劫南越志云形如龜甲或云脚遇春雨則生花

右丞詩來經石蛙春春字非趁韻也古人字無虛  
設如此

自同州四十里至肅州東望大山金人云此新羅  
山其中產人參白附子與高句驪接界見許亢宗  
行程錄云

議政大臣管侍衛內大臣一等公費揚古



謚襄壯

康熙四十年九月二十三日

多羅平郡王訥爾福

謚悼

康熙四十年九月二十三日

鑲白旗漢軍都統雷繼尊

謚敏愨

康熙四十年十月十一日

和碩簡親王雅布

謚修

康熙四十年十一月十三日

和碩顯親王丹臻

謚密

康熙四十一年六月二十三日

都統管九門步軍巡捕三營統領凱音布

謚肅敏

康熙四十一年閏六月十七日

福建陸路提督總兵官左都督贈太子少保王萬祥

謚敏壯

康熙四十一年閏六月十七日

浙江永嘉縣知縣殉難贈布政使司叅政馬璆

謚忠勤

康熙四十二年四月二十六日

太子少傅禮部尚書保和殿大學士致仕加少傅王熙

謚文靖

康熙四十二年五月初四日

吏部尚書文華殿大學士致仕伊桑阿



謚文端

康熙四十二年七月二十一日

廣西富川知縣殉難贈太僕寺少卿劉欽鄰

謚忠節

康熙四十三年 月 日

以副都御史陳論為刑部右侍郎

海寧人辛丑甲辰進士

王彥輔塵史云予在開封時長子渝遊相國寺得唐漳州刺史張登文集一冊六卷權文公為之序其略曰詩賦之外誌記書序等合為一百二十篇彥輔又云所得書肆鏤本纔六十六篇已凶其半矣予續文粹登之文以至金石所傳哀而錄之以廣前集惜彥輔之書亦無傳

古剔犀器以滑地紫屏為貴底如仰瓦光澤而堅薄色如膠棗曰棗兒犀元時禾郡西塘楊滙所作漢僧徒著赤布僧迦梨秣陵僧衣色仿西竺宇文周忌聞黑衣之識易以黃色衣褐亦起于宇文鄭康成尚書中候注云比目魚一名東鯨見紺珠集

內鄉李子田菘撰宋藝圃集二十二卷凡二百八十八人時在隆慶初元海內尊尚李王之派諱言宋詩而子田獨闡幽抉異撰為此書其學識有過人者然于宋初載廖融江為沈彬孟賓于之流皆五



代人也又取馬定國周昂李純甫趙沨龐鑄史肅  
劉昂霄諸人皆中州集所載金源之產定國又劉  
豫僞翰林學士也而與平園誠齋石湖放翁等并  
列淄澠混淆所宜刊正

華州郭宛委宗昌嘗從遼左得倭帥豐臣書一紙  
書間行草古雅蒼勁有晉唐風是朝鮮破後求其  
典籍之書也鱗介之族乃能好古如此王弘撰山

史云

東嘉趙士楨字嘗吉能詩工書明文華殿中書一  
日出內府藏硯悉刻前代年號命士楨改制刻

曆字內有一硯乃唐文皇賜虞世南者士楨奏云  
太宗賢主世南名臣乞留此硯以彰前代君臣相  
與之美從之

漱石閣談云成都有耕者得薛濤墓棺懸石室中  
四圍環以彩牋無慮數萬顏色鮮好觸風散若塵  
霧夫濤死而以牋殉牋在地下歷千年不壞皆理  
之不可信者殆好事者為之耳

兩廣雲貴多有蠱毒飲食後咀嚼當歸即解  
葉蒲州南岩傳治刀瘡藥方端午日取韭菜搗汁  
和石灰杵熟為餅用敷瘡處血即止即骨破亦可



合奇效

劉昫虛盛唐詩人之傑李華作三賢論論昫虛與元德秀蕭穎士曰劉名儒史官之家兄弟以學著稱述詩書禮樂春秋爲五說條貫源流備古今之變劉在京下常寢疾太尉房公時臨扶風聞之通夕不寐謂賓從曰挺卿日若不起無復有神道尚書劉公每詣與談終日忘返嘆曰聞劉公清言見皇王之理矣殷直清有識尚恨言理少對未見劉面常想見其人渤海高適達夫落落有奇氣是皆重劉者也又云元罷魯山終于陸渾劉避地逝于

安康蕭歸葬先人歿於汝南無復下壽云昫虛學行蓋不僅詩人之冠冕惜不槩見于後世而所傳五言亦止十四篇新舊唐書儒學文苑皆不爲昫

虛立傳與韋蘇州同一憾事

昫虛字挺卿今亦無知者

唐劉蛻文冢銘自評其文粲如星光如貝氣如蛟宮之水此喻最妙文冢在今潼川州予康熙壬子曾過之爲賦一詩唐末古文竝稱樵蛻蛻文泉子予所手錄然不逮樵遠甚樵之文在大中時惟杜牧可稱勅敵

吾鄉章丘縣有木氏乃金南渡奸相木虎高琪之



後

歸潛志載劉勳少宣濟南詩云舟行著色屏風裏  
人在回文錦字中勳初名詢字辯老雲中人

金翰林學士趙秉文嘗述堯承旨懷英論詩云律  
詩最難工五十六字皆如聖賢中有一字不經鑪  
錘便如一屠沽兒廁其間也按此五代人劉昭禹  
語堯述之耳

大唐傳載開元東封有太原人于伯隴者年一百  
二十八歲兩孫隨之各年七八十矣詣闕引見自  
言臣神堯皇帝之臣也上賜紫袍牙笏優卹有力

唐時知貢舉皆預定親知權要皆得薦其私人乃  
至榜帖亦屬他人爲之如摭言所載鄭顥託崔雍  
爲榜延至榜除日待榜不至但遣小僮壽兒者傳  
云來早陳賀日暮壽兒寄宿院中夜已艾壽兒以  
蠟丸進顥即榜也主司在院而榜自外來且使命  
出入更無關防已可笑尤可異者杜黃門第一榜  
第三場庭叅之際謂諸生曰未有榜帖尹樞年七  
十餘獨趨進公欣然延之從容授以紙筆樞每劄  
一人則抗聲斥其姓名列庭聞之皆咨嘆嗟其公  
道唯空其元公覽讀致謝訖乃以狀元爲請樞曰



狀元非老夫不可公大奇之即命筆親自劄之狀  
頭出于舉子自定殆近兒戲矣又鄭損舍人為主  
司以陸扆為狀元帖皆請扆自定

范傳正作李翰林墓碑云與賀監汝陽王崔宗之  
裴周南等八人為酒中八仙周南之名杜酒中八  
仙歌無之唐書白本傳所載酒八仙人亦與杜詩

同

唐文宗太和中詔以李白歌詩張旭草書裴旻劍  
舞為三絕命翰林學士為之贊僖宗廣明元年車  
駕幸蜀詔曰行在三絕右散騎常侍李潼有曾閔

之行職方郎中孫樵有揚馬之文前進士司空圖  
有巢許之風列在青史以章有唐中興之德唐代  
留意風雅如此談之芬人齒頰

風俗通漢有太守顧先井音膽有井春今誤作井  
春近在部見爰書有妙姓烏姓盤姓民姓纏姓杵  
姓劑姓律姓茶姓煙姓穰姓首姓卑姓威姓冰姓  
坎姓榻姓攬姓慈姓

章八元賦慈恩塔詩元白見之云不意嚴維出此  
弟子其詩鄙惡俚俗予于居易錄已言之姚園客  
乃以為盧照鄰作又似無目人語矣



李格非文叔易安之父也嘗著洛陽名園記不見其詩露書載其臨淄懷古絕句云擊鼓吹竽七百年臨淄城闕尚依然如今只有耕耘者曾得當時九府錢頗可誦

京山李東白者能詩隱于衣工有登黃鶴樓七律最佳其中二聯云興饒老子胡牀上秋在仙人鐵笛中鄂渚霜花沿岸白漢陽楓樹隔江紅明詩諸選多錄歐大任青衣李英詩而不及東白因著之李宗伯本寧常識其人後舟過雲夢吟詩拍手一笑躍入水死

蜀青城山有牡丹二株皆高三十丈號大將軍小將軍見元人題跋朱圖南謂在羊亘見峭壁上秋海棠高丈餘吐花如錦連綿十里尤奇又玉堂嘉話云海州東峽島生海棠作矮樹花淡紅大如茶盃香韻殊絕每歲進御以金牌記之

治難產方用杏仁一枚去皮一邊書日字一邊書月字用蜂蜜黏住外用熬蜜爲丸滾白水或酒吞下此方乃異僧所傳

露書

中州才士近有襄城李來章禮山劉青藜太乙劉歌詩李古文皆有可傳劉庚辰公車至京師杯酒



間為余言邠縣全軌車同詩文皆擅絕壬午全寄  
余長句瀏灑頓挫與劉勅敵也因語巡撫少司馬  
徐公書來潮門人張侍御蘧若瑗聘主大梁書院  
予昔使秦中偶遊慈恩寺見塔上康乃心題詩亟  
為延譽康遂以此知名當世皆今士人之才而貧  
者也康亦字太乙其詩曰園廟衣冠此內藏野花  
歲歲上陵香邯鄲鼓瑟應如舊贏得佳兒畢六王  
杜子美黑白二鷹詩下人何事網羅求南唐元宗  
謂馮延巳云吹皺一池春水干卿何事舊唐書明  
皇為楚王叱金吾將軍武懿宗曰吾家朝堂干汝

何事敢迫吾騎從此語在前見本紀

五月二十五日 駕幸古北口外避暑

弇州卮言載滄溟在關中過許中丞宗魯伯誠許  
問今天下名能詩何人滄溟曰唯王元美次則宗  
臣子相許請子相詩觀之滄溟勃然曰夜來火燒  
却許面赤而已余嘗嗤之夫子相詩未必能過伯  
誠即索觀亦屬恒事何至怫然如此又蔡子木入  
覲酒間自歌其夔州諸作吳明卿輒斲睡斲聲與  
歌聲相低昂歌罷斲亦止今觀明卿詩品亦未能  
過子木也文士護前往夜郎王自大適足為識



者軒渠耳厥後蔡巡撫中州吳謫歸德府推官與  
徐子與張肖甫皆為屬官蔡身為行酒曰吾安敢  
有其一以傲三君子哉子木固盛德不知爾時明  
卿當復置身何地特著二事以為文士相輕之戒  
云

胡應麟作丹鉛新錄菘林學山以駁升菴自負博  
辯然舛譌復不自覺如引三國志關某傳注謂羽  
欲娶布妻啓曹公疑布妻有殊色因自留之按此  
乃秦宜祿妻與布何涉元瑞豈未一檢陳書耶又  
唐人長安女兒踏春陽一絕見沈亞之集異夢錄

胡止據博異志似未覩沈集者田汝成西湖志餘  
又傳會以為宋人西湖事謂為水仙與鳳俱沈湖  
中則荆襲司馬才仲遇蘇小事而為之尤可笑

嘉陵江岸有刀鏤山康熙丙子余再使蜀舟過之

口占絕句云晨過赤銅水望見刀鏤山閨中應計

日不見橐砧還赤銅亦利州水名蓋用古樂府橐砧今何在

山上復有山何當大刀頭破鏡飛上天語也此詩  
偶逸之未編入雍益集聊記此

范德機嘗得十字云雨止修竹間流螢夜深至既  
復曰語太幽殆類鬼作吳正傳師道禮部集一條



云聞之危大樸昔與先生秋夜不寐微步山中得  
此二句喜甚且曰云云當以他語映帶之因足成  
此章云右二語果佳余少時有句云螢火出演碧  
池荷間暗香故友葉文敏訥菴方極喜之取入獨  
賞集

胡氏經籍會通云燕中書肆多在大明門之右及  
禮部門外拱辰門西花朝後三日則移于燈市每  
朔望并下浣五日則徙于城隍廟中燈市歲三日  
廟市月三日今京師書肆皆在正陽門外海河沿  
餘惟琉璃窯廠間有之而不多見燈市初在靈佑

宮稍列書攤自回祿後移于正陽門大街之南則  
無書矣每月朔望及下浣五日百貨集慈仁寺書  
攤止五六往間有秘本二十年來絕無之余庚申  
冬過之有兩漢紀初印本最精又三禮經傳通解  
亦舊刻議價未就旬日市期早過之二書已為人  
購去懊恨累日至廢寢食壬午夏見舊版雍錄雕  
刻極工重過之已爲人購去矣癸未夏得陳子昂  
文集十卷猶是故物然如優鉢羅花偶一見耳  
康熙壬午年吾鄉有少年十餘人自登萊往濟南  
肩舁數籠籠有虎一熊一又一羊六足一犬三足



欲觀者先以錢投之覆資無算

文殊普賢廡打本釋家語宋叅政錢象祖與史彌遠合謀誅殺韓侂冑請和于金時人爲之語曰文殊普賢自鬪象祖打殺師王蓋侂冑以太師封平原郡王佞者皆稱師王故也可謂善謔

杭州靈隱寺飛來峰有楊璉真伽石像嘉靖二十二年福清陳仕賢知杭州命斬之田汝成記其事比於申屠廸毀曹操之廟頃張御史瑗請平西山碧雲寺魏忠賢墓仆其碑碎之有關名教可竝傳也

嘗見一書言今江浙所祀五通邪神乃明太祖伐陳友諒陣亡士卒詔令五人一隊得受香火云云而武林聞見錄又載宋嘉泰中大理寺決一囚數日後見形獄吏云泰和樓五通神虛位某欲充之求一差檄言差充某神位得此爲據可矣如其言經數月東庫人聞樓上五通神日夜喧闐如爭競狀吏乃泄前事爲增塑一神像遂寂然則宋時已有五通之說不自明初始至于決囚鑽營僞牒得補神位則其爲邪魅昭然矣吳越之人信而畏之理不可解宜湯潛菴試碎其土偶投畀湖中也



唐肅宗賜李輔國香玉辟邪二長一尺五寸香聞數百步南宋有李大卿者其子娶韓平原之女奩中有香玉師子高二尺五寸精妙無比後歸福邸

支硎山有泉自石罅流出雖大旱不竭相傳支道林遺跡也有賈胡過之坐臥其側凡半月取一玉蟹而去

五侯鯖載薛瓊至孝家貧采薪遇老父以一物遺之曰此銀實也用四壁土種之銅盆中當得銀如言種之旬日生苗再旬開花花有銀色如鈿螺及

結實皆銀也銀亦可種與雍伯種玉皆奇聞

米紫來漢宛平人明太僕友石萬鍾之孫也父壽都

字吉土亦知名紫來以順治十八年辛丑登第多技藝工書畫書仿南宮尤工金石篆刻以長葛知縣行取適有博學宏詞之舉改翰林編修以典試累謨久之 召入供奉 內庭遷侍講 賜宅西華門尋病卒太僕有勺園在京城西海淀與武清侯清華園相望亦曰風煙里今 暢春苑即兩園故址也紫來少喜交游所交游皆海內名士與子最相善頗有倡和其詩惜為書畫所掩亦散佚無



傳矣

蔡來曾以其遺  
中詩屬于論次

藥花入詩多新異如陳白沙恰到溪窮處山山  
枳殼花之類予居易錄載之矣偶讀南宋姜堯章集  
一絕云憐君歸橐路迢迢到得茅齋轉寂寥應嘆  
藥闌經雨爛土肥抽盡縮砂苗亦佳然以藥闌為  
藥物之藥則誤耳

唐人柳枝詞專詠柳竹枝詞則泛言風土如楊廉  
夫西湖竹枝之類前人亦有一二專詠竹者殊無  
意致宋葉水心又勑為橘枝詞叵友汪鈍翁琬編  
修亦擬作二首其一云郎行時節橘花零南風吹

來香滿庭今年橘實大如斗勸郎莫羨楚江萍  
姜白石詩說有數則可取錄之人所易言我寡言  
之人所難言我易言之難說處一語而盡易說處  
莫便放過僻事實用熟事虛用學有餘而約以用  
之善用事者也意有餘而約以盡之善措辭者也  
篇終出人意表或反終篇之意皆妙句中無餘字  
篇中無長語非善之善者也句中有餘味篇中有  
餘意善之善者也始于意格成于句字詩有四種  
高妙一曰理高妙二曰意高妙三曰想高妙四曰  
自然高妙一篇全在結句如截奔馬辭意俱盡如



臨水送將歸辭盡意不盡若夫意盡辭不盡剡溪  
歸棹是也辭意俱不盡温伯雪子是也一家之言  
自有一家風味如樂之二十四調各有韻聲乃是  
歸宿處樵仿者語雖似之韻則凶矣右論詩未到  
嚴滄浪頗亦足叅微言温伯雪子目擊而道  
存見莊子田子方篇  
陳忠國字升揆公安人諸生曾中四川鄉試副榜  
以冒籍黜壬午來京師其鬚長過于膝行則自兩  
肩搭于背上每行過市人競隨觀之趙統詩話杭  
人陸濤言其鄉有役為老人者鬚長委地行則辨  
而繞之頸又白醉瓊言云攸縣有徐寨主者鬚十

餘莖以囊盛之舒之則其修二丈

元鮮于伯機記杭醫宋會之者善治水蠱以乾絲  
瓜一枚去皮剪碎入巴豆十四粒同炒以巴豆黃  
色為度去巴豆用絲瓜炒陳倉米如絲瓜之多少  
候米黃色去絲瓜研之為末和清水為丸如桐子

大每服百丸皆愈

宋言巴豆逐水絲瓜象人脉絡去而  
不用藉其氣以引之也米投胃氣也

宋時武林馬騰藏花之法紙糊密室鑿地作坎覆  
竹置花其上糞土以牛溲硫黃然後置沸湯于坎  
中候湯氣薰蒸則扇之經宿則花放今京師園丁  
亦然予嘗以冬月寄諸盆花約明年花樹不敗則



酬其直惟桂花不能如舊西湖志餘謂桂必清涼  
而後放法當置石洞岩竇間暑氣不到處鼓以涼  
颼乃開今與桃梅牡丹之屬同置煖室地窖宜其  
不殖也此亦格物者所當知

從伯文玉諱與玟號能詩嘗有詠宋高宗一絕云  
千金空買玉孩兒不得其解讀西湖志餘高宗嘗  
宴大臣見張循王後持扇有玉孩兒扇墜上識是  
舊物昔往四明誤墜于水者問俊所從得對曰臣  
從清河坊舖家買得之詢舖家云得之提籃人復  
詢之乃從候潮門外陳宅厨孃處得之詢之厨孃

云破黃花魚腹中所得也上大悅舖家提籃人補  
校尉厨孃封孺人

中牟縣城南有湖數十畝中有亭額以蒲盧爲邑  
名士張林宗民表觴詠之地子丙子以奉使祭告西  
嶽過之惜其命名非典因爲易名墊巾以存林宗  
之舊使後來知名流故蹟按毛詩小宛疏云螟蛉  
桑蟲也果羸蒲盧也細腰土蜂謂之蒲盧郭璞爾  
雅注細腰蜂俗呼蠮螋若水中之蒲其根著在土  
而浮蔓多緣木故亦或謂之果羸是細腰水蒲得  
以互稱于命名之義無一可者不知當時義何居



也  
子甲子冬奉使祭告南海之神歲杪次桐城大雪  
中陳默公<sup>焯</sup>初未相見即過子客署二從者背負  
巨囊揖罷即呼具案顧從者取囊書數十大冊羅  
列案上指示予曰此吾二十年來所輯宋元詩會  
若干卷聞公奉使當過此喜甚將待公決擇之然  
後出問世耳已過其滌岑雪中遠眺龍眠諸山縱  
觀是書竟日賓主談諧無一言及世事此亦冠蓋  
交游中所少默公順治壬辰進士二甲臚傳第一  
以耳聾不仕終

予以乙丑二月抵南海始與陳元孝<sup>恭</sup>定交揖甫  
罷即出一端石小研相示曰吾得此水坑石甚寶  
惜之將以梁子藥亭公車之便屬寄公于京師既  
聞奉使當至粵故留以俟視其側有銘八字云獨  
漉之貽漁洋寶之元孝工漢隸此其手書也予甚  
珍之獨漉元孝別字亦自稱羅浮布衣子勵後中  
已卯舉人

陳衍奇石記云米仲詔嗜石有五石最奇一靈壁  
石高四寸餘延袤陂陀勢如大山四面皆畫家皴  
法近山脚特起一臺臺上平下削平處刻伯原二



香林齋詩卷三  
字小篆絕佳伯原元清碧先生杜本字也又一靈  
壁石非方非圓週遭如屏郭有脉兩道作殷紅色  
自凹處垂下如瀑布之射朝日高八寸許圍徑尺  
純黑凝潤如膏一英德石高四寸長七寸如雙虬  
盤臥玲瓏透漏千蹊萬徑穿穴鈎連一兗州石大  
如拳堅緻有聲得之嶧山一仇池石亦如拳峰巒  
洞壑奇巧殊絕刻其側曰小武夷

明大內英華殿供西番佛像殿前菩提樹二孝定  
皇太后手植也光祿寺志云英華殿四月八日供  
大不落夾二百對小不落夾三百對叔祖季木考

功詩云慈寧宮裏佛龕崇瑤水珠燈照碧空四月  
虔供不落夾內官催辦小油紅蓋紀此事也慈寧  
宮當作英華殿為確

荆州南門有息壤其來舊矣上有石記云犯之頗  
致雷雨康熙元年荆州大旱州人請掘息壤出南  
門外堤上掘不數尺有狀若屋而露其脊者再下  
尺許啓屋而入見一物正方上銳下廣非土非木  
亦非金石有文如古篆土人云即息壤也急掩之  
其夜大雨歷四十餘日江水泛溢決萬城堤幾壞  
城



海寧孝廉查伊璜繼佐崇禎中名士也嘗冬雪偶步門外見一丐避廡下貌殊異呼問曰聞市井有鐵丐者汝是否曰是也能飲乎曰能引入發醅坐而對飲查已茗芋而丐殊無酒容衣以絮衣不謝徑去明年復遇之西湖放鶴亭下露肘跣行詢其衣曰入春不須此已付酒家矣曰曾讀書識文字乎曰不讀書識字何至爲丐耶查奇其言爲具湯沐而衣履之詢其氏里曰吳姓六奇名東粵人問何以丐曰少好博進敗其產散流轉江湖自念叩門乞食昔賢不免僕何人敢以爲污查遽起捉其

臂曰吳生海內奇士我以酒徒目之失吳生矣留與痛飲一月厚資遣之六奇者家世潮陽祖明世爲觀察以樗蒲故遂爲窶人既歸粵寄食充驛卒稔知關河阨塞形勢會王師入粵邏者執六奇六奇曰請得見大帥言事既見備陳諸郡形勢因請給遊劄數十通散其土豪所至郡縣壁壘皆下帥上其功十年中累官至廣東水陸師提督孝廉家居久不復記憶前事一旦有粵中牙將叩門請謁致吳書問以三千金爲壽邀致入粵水行三千里供帳極盛度梅嶺已遣其子迎候道左所過部下



將吏皆負簞抱弩矢爲前驅抵惠州吳躬自出迎  
導從雜沓擬于侯王至戟門則蒲伏泥首登堂北  
面長跪歷叙往事無所忌諱入夜置酒高會身行  
酒炙歌舞妙麗絲竹迭陳諸將遞起爲壽質明始  
罷自是留止一載裝累鉅萬將歸復以三千金爲  
壽錦綺珠貝珊瑚犀象之屬不可訾計查既歸數  
年值吳興私史之獄牽連及之吳爲之營救查遂  
獲免于難初查在惠州幕府一日遊後圃圃有英  
石一峰高二丈許淡賞異之再往已失此石問之  
則以巨艦載致吳中矣今石尚存查氏之家六奇

後卒官贈少師兼太子太師謚順恪

武昌小南門獻花寺老僧自究者病噎食臨終謂  
其徒曰我不幸罹斯疾胸臆間必有物爲祟歿後  
剖視乃可入斂其徒如教得一骨如簪形取置經  
案久之有兵帥借寓一日從者殺鵝其喉未殊偶  
見此骨取以挑刺鵝血濺骨骨立消後其徒亦病  
噎因前事悟鵝血可療數飲之遂愈因廣其傳以  
方授人無弗愈者

唐初修隋史不爲文中子立傳千古疑之且其時  
總裁者魏徵秉筆者陳叔達皆及門也而房杜諸



人又皆佐命力豈不能為其師立一史傳而必待  
三百年後宋景文修唐書始為之表章于王績勃  
質諸傳耶頃閱仇後卿通史它石論此甚快可破  
千古之疑其說本于宋史非翔也宋史謂通為長  
孫無忌所惡當時畏無忌故遺通而無忌之惡王  
氏則由于王凝次子勳劾貶侯君集君集與無忌  
善因而惡及其祖耳初叔達撰隋紀王績欲借觀  
且曰吾芮城兄亦有隋書若干卷欲續成以終其  
志殆諷之也予謂隋書不為王通立傳五代史不  
為韓通立傳二公未嘗以一傳有無為輕重獨可

為當時操史筆者惜耳

韓通不立傳亦別有說。道次  
子福時福時子凝凝子勳勳

香祖筆記卷三終



三

三

三

三

三

三



